

四庫全書

史部

欽定四庫全書

繹史卷一百四

靈壁縣知縣馬驥撰

魯穆公用賢

鄒穆公附

孔叢子魯穆公訪於子思曰寡人不得嗣先君之業二年矣未知所以為令名者且欲掩先君之惡以揚先君之善使談者有述焉為之若何願先生教之也子思答曰以伋所聞舜禹之於其父非勿欲也以為私情之細不如公義之大故弗敢私之云耳責以虛飾之教又非

伋所得言公曰思之可以利民者子思曰顧有惠百姓之心則莫如一切除非法之事也毀不居之室以賜窮民奪嬖寵之祿以賑困匱無令人有悲怨而後世有聞見抑亦可公曰諾 穆公問子思曰吾國可興乎子思曰可公曰為之奈何對曰苟君與大夫慕周公伯禽之治行其政化開公家之惠杜私門之利結恩百姓修禮鄰國其興也勃矣 穆公問於子思曰立太子有常乎答曰有之在周公之典公曰昔文王舍適而立其次微

子舍孫而立其弟是何法也子思曰殷人質而尊其尊
故立弟周人文而親其親故立子亦各其禮也文質不
同其禮則異文王舍適立次權也公曰苟得行權豈唯
聖人唯賢與愛立也子思曰聖人不以權教故立制垂
法順之為貴若必欲犯何有於異公曰舍賢立聖舍愚
立賢何如子思曰唯聖立聖其文王乎不及文王者則
各賢其所愛不殊於適何以限之必不能審賢愚之分
請父兄羣臣卜於祖廟亦權之可也 穆公謂子思曰

縣子言子之為善不欲人譽已信乎子思對曰非臣之情也臣之修善欲人知之知之而譽臣是臣之為善有勸也此所願而不可得者也若臣之修善而人莫知莫知則必毀臣是臣之為善而受毀也此臣所不願而不可避者也若夫雞鳴為善滋滋以至夜半而曰不欲人之知恐人之譽已臣以為斯人也者非虛則愚也

韓非子魯穆公問於子思曰吾聞龐糲氏之子不孝其行奚如子思對曰君子尊賢以崇德舉善以勸民若夫

過行是細人之所識也臣不知也子思出子服厲伯入
見問龐糴氏子子服厲伯對曰其過三皆君之所未嘗
聞自是之後君貴子思而賤子服厲伯也或曰魯之公
室三世劫於季氏不亦宜乎明君求善而賞之求姦而
誅之其得之一也故以善聞之者以說善同於上者也
以姦聞之者以惡姦同於上者也此宜賞譽之所及也
不以姦聞是異於上而下比周於姦者也此宜毀罰之
所及也今子思不以過聞而穆公貴之厲伯以姦聞而

穆公賤之人情皆喜貴而惡賤故季氏之亂成而不上聞此魯君之所以劫也且此亡王之俗取魯之民所以自美而穆公獨貴之不亦倒乎

孔叢子穆公謂子思曰子之書所記夫子之言或者以謂子之辭子思曰臣所記臣祖之言或親聞之者或聞之於人者雖非正其辭然猶不失其意焉且君之所疑者何公曰於事無非子思曰無非所以得臣祖之意也就如君言以為臣之辭臣之辭無非則亦所宜貴矣事

既不然又何疑焉 閭丘溫見田氏將必危齊欲以其
邑叛而適魯穆公聞之謂子思曰子能懷之則寡人割
邑如其邑以常宗子思曰伋雖能之義所不為也公曰
何子思對曰彼為人臣君將敗弗能扶而叛之逆臣制
國弗能以其身死而逃之此罪誅之人也伋縱不能討
而又要利以召姦非忍行也 魯人有公儀僭者砥節
礪行樂道好古恬於榮利不事諸侯子思與之友穆公
因子思欲以為相謂子思曰公儀子必輔寡人參分魯

國而與之一子其言之子思對曰如君之言則公儀子
愈所以不至也君若饑渴待賢納用其謀雖蔬食水飲
汲亦願在下風令徒以高官厚祿釣餌君子無信用之
意公儀子之智若魚鳥可也不然則彼將終身不躡乎
君之庭矣且臣不佞又不任為君操竿下釣以蕩守節
之士也

○僭或
作潛

禮記穆公問於子思曰為舊君反服古與子思曰古之
君子進人以禮退人以禮故有舊君反服之禮也今之

君子進人若將加諸膝退人若將隊諸淵毋為戎首不亦善乎又何反服之禮之有

○禮弓

孔叢子穆公欲相子思子思不願將去魯魯君曰天下之主亦猶寡人也去將安之子思答曰蓋聞君子猶鳥也疑之則舉今君既疑矣又以已限天下之君臣竊為

言之過也

呂氏春秋孔思請行魯君曰天下主亦猶寡人也將焉之孔思對曰蓋聞君子猶鳥也駭

則舉魯君曰主不肖而皆以然也違不肖過不肖而自以為能論天下之主乎凡鳥之舉也去駭從不駭去駭從不駭未可知也去駭從駭則鳥曷為舉矣孔思之對魯君也亦過矣

史記公儀休者魯博士也以高第為魯相奉法循理無所變更百官自正使食祿者不得與下民爭利受大者不得取小客有遺相魚者相不受客曰聞君嗜魚遺君魚何故不受也相曰以嗜魚故不受也今為相能自給魚今受魚而免誰復給我魚者吾故不受也食茹而美拔其園葵而棄之見其家織布好而疾出其家婦燔其機云欲令農士工女安所讎其貨乎

韓非子公孫儀相魯而嗜魚一國盡

爭買魚而獻之公儀子不受其弟諫曰夫子嗜魚而不受者何也對曰夫唯嗜魚故不受也夫即受魚必有下

人之色有下人之色將枉於法枉於法則免於相雖嗜魚此不必能致我魚我又不能自給魚即無受魚而不免於相雖嗜魚我能長自給魚此明夫恃人不
如自恃也明於人之為己者不如己之自為也

禮記叔仲皮學子柳叔仲皮死其妻魯人也衣衰而繆經叔仲衍以告請總衰而環經曰昔者吾喪姑姊妹亦如斯末吾禁也退使其妻總衰而環經子柳之母死子碩請具子柳曰何以哉子碩曰請粥庶弟之母子柳曰如之何其粥人之母以葬其母也不可既葬子碩欲以賻布之餘具祭器子柳曰不可吾聞之也君子不家

於喪請班諸兄弟之貧者○

禮

泄柳之母死相者由

左泄柳死其徒由右相由右相泄柳之徒為之也

○雜記

歲旱穆公召縣子而問然曰天久不雨吾欲暴尫而

奚若曰天則不雨而暴人之疾子虐毋乃不可與然則

吾欲暴巫而奚若曰天則不雨而望之愚婦人於以求

之母乃已疏乎徙市則奚若曰天子崩巷市七日諸侯

薨巷市三日為之徙市不亦可乎 穆公之母卒使人

問於曾子曰如之何對曰申也聞諸申之父曰哭泣之

哀齊斬之情饘粥之食自天子達布幕衛也繆幕魯也
縣子瑣曰吾聞之古者不降上下各以其親滕伯文
為孟虎齊衰其叔父也為孟皮齊衰其叔父也 縣子

曰綌衰總裳非古也 后木曰喪吾聞諸縣子曰夫喪

不可不深長思也買棺外內易我死則亦然 ○檀弓 縣

子曰三年之喪如斬期之喪如刻 ○雜記

列女傳魯漆室女過時未適人當穆公時君老太子幼
女倚柱而嘯其鄰人婦從之遊曰何嘯之悲也子欲嫁

邪漆室女曰嗟乎吾始以子為有知今無識也吾憂魯君老太子幼鄰婦笑曰此乃魯大夫之憂婦人何與焉漆室女曰非子所知也昔晉客舍吾家繫馬園中馬佚馳走踐吾葵使我終歲不食葵鄰人女奔隨人亡其家倩吾兄行追之逢霖水出溺流而死令吾終身無兄吾聞河潤九里漸洳三百步今魯君老悖太子少愚魯國有患君臣父子皆被其辱禍及衆庶婦人獨安所避乎吾甚憂之三年魯果亂齊楚攻之男子戰鬪婦人轉輸

不得休息君子曰遠矣漆室女之思也詩云知我者謂

我心憂不知我者謂我何求此之謂也

韓詩外傳魯監門之女嬰相從

續中夜而泣涕其偶曰何謂而泣也嬰曰吾聞衛世子不肖所以泣也其偶曰衛世子不肖諸侯之憂也子曷為泣也嬰曰吾聞之異乎子之言也昔有宋之桓司馬得罪于宋君出于魯其馬佚而驟吾園而食吾園之葵是歲吾聞園人亡利之羊越王勾踐起兵而攻吳諸侯畏其威魯往獻女吾姊與馬兄往視之道畏而死越兵威者吳也兄死者我也由是觀之禍與福相反也今衛世子甚不肖好兵吾男弟三人能無憂乎詩曰大夫跋涉我心則憂是非類與乎○亦漆室女之異聞琴操魯漆室女倚柱悲吟鄰人進而問之曰有淫心欲嫁邪何吟之悲也漆室女曰嗟乎吾憂國傷人心豈欲嫁哉自傷懷潔而為人所疑於是褰裳入山林之中見女貞

之木喟然歎息援琴而歌女貞之辭曰菁菁茂木隱獨榮兮變化垂枝含蕤英兮修身養志建令名兮厥道不同善惡并兮屈躬就濁世疑清兮懷忠見疑何貪生兮遂自經而死○一本作次室女

說苑辛櫟見魯穆公曰周公不如太公之賢也穆公曰子何以言之辛櫟對曰周公擇地而封曲阜太公擇地而封營丘爵土等其地不若營丘之美人民不如營丘之衆不徒若是營丘又有天固穆公心慙不能應也辛櫟趨而出南宮邊子入穆公具以辛櫟之言語南宮邊子南宮邊子曰昔周成王之卜居成周也其命龜曰子

一人兼有天下辟就百姓敢無中土乎使予有罪則四方伐之無難得也周公卜居曲阜其命龜曰作邑乎山之陽賢則茂昌不賢則速亡季孫行父之戒其子曰曰吾欲室之俠於兩社之間也使吾後世有不能事上者使其替之益速如是則曰賢則茂昌不賢則速亡安在擇地而封哉或示有天固也辛櫟之言小人也子無復

道也

呂氏春秋辛寬見魯繆公曰臣而今而後知吾先君周公之不若太公望封之知也昔者太公望封

於營丘之渚海阻山高險固之地也是故地日廣子孫彌隆吾先君周公封于魯無山林谿谷之險諸侯四面

以達是故地日削子孫彌殺卒寬出南宮括入見公曰
今者寬也非周公其辭若是也南宮括對曰寬少者弗
識也君獨不聞成王之定成周之說乎其辭曰惟余一
人營居於成周惟余一人有善易得而見也有不善易
得而誅也故曰善者得之不善者失之古之道也夫賢
者豈欲其子孫之阻山林之險以長為無道哉小人哉
也寬

韓非子魯穆公使衆公子或宦於晉或宦於荆犁鉏曰
假人於越而救溺子越人雖善游子必不生矣失火而
取水於海海水雖多火必不滅矣遠水不救近火也今
晉與荆雖強而齊近魯患其不救乎

說苑公儀休相魯魯君死左右請閉門公儀休曰止池淵吾不稅蒙山吾不賦苛令吾不布吾已閉心矣何閉

於門哉

已後附
鄒穆公

新書鄒穆公有令食鳧鴈者必以粃毋敢以粟於是倉無粃而求易於民二石粟而易一石粃吏以請曰粃食鴈為無費也今求粃於民二石粟而易一石粃以粃食鴈則費甚矣請以粟食之公曰去非而所知也夫百姓照牛而耕曝背而耘苦勤而不敢惰者豈為鳥獸也哉

粟米人之上食也奈何其以養鳥也且汝知小計而不
知大會周諺曰囊漏貯中而獨弗聞與夫君者民之父
母也取倉之粟移之與民此非吾粟乎鳥苟食鄒之糝
不害鄒之粟而已粟之在倉與其在民於吾何擇鄒民
聞之皆知其私積之與公家為一體也 楚王欲淫鄒
君乃遺之技樂美女四人穆公朝觀而夕畢以妻死事
之孤故婦人年弗稱者弗畜節於身而弗衆也王輿不
衣皮帛御馬不食禾菽無淫僻之事無驕燕之行食不

衆味衣不雜采自刻以廣民親賢以定國親民如子鄒
國之治路不拾遺臣下順從若手之投心是故以鄒子
之細魯衛不敢輕齊楚不能脅鄒穆公死鄒之百姓若
失慈父行哭三月四境之鄰於鄒者士民鄉方而道哭
抱手而憂行酤家不售其酒屠者罷烈而歸傲童不謳
歌春築者不相杵婦女扶珠璣丈夫釋玦軒琴瑟無音
暮年而後始復故愛出者愛入福徃者福來易曰鳴鶴
在陰其子和之其此之謂乎故曰天子有道守在四夷

諸侯有道守在四鄰

繹史卷一百四

欽定四庫全書

繹史卷一百五

靈壁縣知縣馬驥撰

吳起仕魏相楚

韓非子吳起衛左氏中人也使其妻織組而幅狹於度
吳子使更之其妻曰諾及成復度之果不中度吳子大
怒其妻對曰吾始經之而不可更也吳子出之其妻請
其兄而索入其兄曰吳子為法者也其為法也且欲以
與萬乘致功必先踐之妻妾然後行之子毋幾索入矣

其妻之弟又重於衛君乃因以衛君之重請吳子吳子不聽遂去衛而入荆也一曰吳子示其妻以組曰子為我織組令之如是組已就而效之其組異善起曰使子為組令之如是而今也異善何也其妻曰用財若一也加務善之吳起曰非語也使之衣歸其父徃請之吳起曰起家無虛言吳起出遇故人而止之食故人曰諾令返而御吳子曰待公而食故人至暮不來起不食待之明日蚤令人求故人故人來方與之食魯季孫新

弑其君吳起仕焉或謂起曰夫死者始死而血已血而
血已血而灰已灰而土反其土也無可為者矣今季孫
乃始血其母乃未可知也吳起因去之晉

史記吳起者衛人也好用兵嘗學於曾子事魯君齊人
攻魯魯欲將吳起吳起取齊女為妻而魯疑之吳起於
是欲就名遂殺其妻以明不與齊也魯卒以為將將而
攻齊大破之魯人或惡吳起曰起之為人猜忍人也其
少時家累千金游仕不遂遂破其家鄉黨笑之吳起殺

其謗已者三十餘人而東出衛郭門與其母訣齧臂而盟曰起不為卿相不復入衛遂事曾子居頃之其母死起終不歸曾子薄之而與起絕起乃之魯學兵法以事魯君魯君疑之起殺妻以求將夫魯小國而有戰勝之名則諸侯圖魯矣且魯衛兄弟之國也而君用起則是棄衛魯君疑之謝吳起吳起於是聞魏文侯賢欲事之文侯問李克曰吳起何如人哉李克曰起貪而好色然用兵司馬穰苴不能過也於是魏文侯以為將擊秦拔

五城

吳子吳起儒服以兵機見魏文侯文侯曰寡人不好軍旅之事起曰臣以見占隱以往察來主君何言與心違今君四時使斬離皮革掩以朱漆畫以丹青鑠以象犀冬日夜之則不溫夏日衣之則不涼為長戟二丈四尺短戟一丈二尺革車掩戶縵綸籠轂觀之於目則不麗乘之於田則不輕不識主君安用此也若以備進戰退守而不求能用者譬猶伏雞之搏狸乳犬之犯虎雖有

關心隨之死矣昔承桑氏之君修德廢武以滅其國有
扈氏之君恃衆好勇以喪其社稷明主鑒茲必內修文
德外治武備故當敵而不進無逮於義矣僵尸而哀之
無逮於仁矣於是文侯身自布席夫人捧觴醺吳起於
廟立為大將守西河與諸侯大戰七十六全勝六十四
餘則均解關土四面拓地千里皆起之功也

史記起之為將與士卒最下者同衣食臥不設席行不
騎乘親裹贏糧與士卒分勞苦卒有病疽者起為吮之

率母聞而哭之人曰子率也而將軍自吮其疽何哭為
母曰非然也往年吳公吮其父其父戰不旋踵遂死於
敵吳公今又吮其子妾不知其死所矣是以哭之文侯
以吳起善用兵廉平盡能得士心乃以為西河守以拒

秦韓

說苑吳起為魏將攻中山軍人有病疽者吳子自吮其膿其母泣之旁人曰將軍於而子如是尚何

為泣對曰吳子吮此子父之創而殺之於注水之戰戰不旋踵而死今又吮之安知是子何戰而死是以哭之

矣

漢書兵推謀

吳起四十八篇

吳子吳起曰昔之圖國家者必先教百姓而親萬民有

四不和不和於國不可以出軍不和於軍不可以出陳
不和於陳不可以進戰不和於戰不可以決勝是以有
道之主將用其民先和而後造大事不敢信其私謀必
告於祖廟啓於元龜參之天時吉乃後舉民知君之愛
其命惜其死若此之至而與之臨難則士以進死為榮
退生為辱矣 吳子曰凡制國治軍必教之以禮勵之
以義使有恥也夫人有恥在大足以戰在小足以守矣
然戰勝易守勝難故曰天下戰國五勝者禍四勝者弊

三勝者霸二勝者王一勝者帝是以數勝得天下者稀
以亡者衆 吳子曰凡兵之所起者有五一日爭名二
曰爭利三曰積惡四曰內亂五曰因饑其名又有五一
曰義兵二曰強兵三曰剛兵四曰暴兵五曰逆兵禁暴
救亂曰義恃衆以伐曰強因怒興師曰剛棄禮貪利曰
暴國亂人疲舉事動衆曰逆五者之服各有其道義必
以禮服強必以謙服剛必以辭服暴必以詐服逆必以
權服

尉繚子吳起臨戰左右進劔起曰將專主旗鼓爾臨難
決疑揮兵指刃此將事也一劔之任非將事也三軍成
行一舍而後成三舍三舍之餘如決川源望敵在前因
其所長而用之敵白者望之赤者赭之吳起與秦戰未
合一夫不勝其勇前獲雙首而還吳起立斬之軍吏諫
曰此材士也不可斬起曰材士則是也非吾令也斬之
史記魏文侯既卒起事其子武侯武侯浮西河而下中
流顧而謂吳起曰美哉乎山河之固此魏國之寶也起

對曰在德不在險昔三苗氏左洞庭右彭蠡德義不脩
禹滅之夏桀之居左河濟右泰華伊闕在其南羊腸在
其北修政不仁湯放之殷紂之國左孟門右太行常山
在其北大河經其南修政不德武王殺之由此觀之在
德不在險若君不修德舟中之人盡為敵國也武侯曰
善即封吳起為西河守甚有聲名

戰國策魏武侯與諸大夫浮於西河稱曰河山之險不
亦信固哉王鍾侍坐曰此晉國之所以強也若善修之

則霸王之業具矣吳起對曰吾君之言危國之道也而子又附之是重危也武侯忿然曰子之言有說乎吳起對曰河山之險信不足保也是霸王之業不從此也昔者三苗之居左有彭蠡之波右有洞庭之水汶山在其南而衡山在其北恃此險也為政不善而禹放逐之夫夏桀之國左天門之陰而右天谿之陽盧瓘在其北伊洛出其南有此險也然為政不善而湯伐之殷紂之國左孟門而右漳釜前帶河後被山有此險也然為政不

善而武王伐之且君親從臣而勝降城城非不高人民
非不衆也然而可得并者政惡故也從是觀之地形險
阻奚足以霸王矣武侯曰善吾乃今日聞聖人之言也
西河之政專委之子矣

說苑魏武侯問元年於吳子吳子對曰言國君必慎始
也慎始奈何曰正之正之奈何曰明智智不明何以見
正多聞而擇焉所以明智也是故古者君始聽治大夫
而一言士而一見庶人有謁必達公族請問必語四方

至者勿距可謂不壅蔽矣分祿必及用刑必中君心必仁思君之利除民之害可謂不失民衆矣君身必正近臣必選大夫不兼官執民柄者不在一族可謂不權勢矣此皆春秋之意而元年之本也

韓非子吳起為魏武侯西河之守秦有小亭臨境吳起欲攻之不去則甚害田者去之則不足以徵甲兵於是乃倚一車轅於北門之外而令之曰有能徙此南門之外者賜之上田上宅人莫之徙也及有徙之者還賜之

如令俄又置一石赤菽東門之外而令之曰有能徙此

於西門之外者賜之如初人爭徙之乃下令大夫曰明

日且攻亭有能先登者仕之國大夫賜之上田宅人爭

趨之於是攻亭一朝而拔之

呂氏春秋吳起治西河欲諭其信於民夜日置表於

南門之外令于邑中曰明日有人僨南門之外表者仕長大夫明日日晏矣莫有僨表者民相謂曰此必不信有一人曰試往僨表不得賞而已何傷往僨表來謁吳起吳起自見而出仕之長大夫夜日又復立表又令於邑中如前邑人守門爭表表加植不得所賞自是之後民信吳起之賞罰賞罰信乎民何事而不成豈獨兵乎莊子徐無鬼因女商見魏武侯武侯勞之曰先生病矣

苦於山林之勞顧乃肯見於寡人徐無鬼曰我則勞於君君有何勞於我君將盈嗜欲長好惡則性命之情病矣君將黜嗜欲擊好惡則耳目病矣我將勞君君有何勞於我武侯超然不對少焉徐無鬼曰嘗語君吾相狗也下之質執飽而止是狸德也中之質若視日上之質若亡其一吾相狗又不若吾相馬也吾相馬直者中繩曲者中鈎方者中矩圓者中規是國馬也而未若天下馬也天下馬有成材若卹若失若喪其一若是者超軼

絕塵不知其所武侯大說而笑徐無鬼出女商曰先生
獨何以說吾君乎吾所以說吾君者橫說之則以詩書
禮樂從說之則以金板六弢奉事而大有功者不可為
數而吾君未嘗啓齒今先生何以說吾君使吾君說至
此乎徐無鬼曰吾直告之吾相狗馬耳女商曰若是乎
曰子不聞夫越之流人乎去國數日見其所知而喜去
國旬月見所嘗見於國中者喜及期年也見似人者而
喜矣不亦去人滋久思人滋深乎夫逃虛空者藜藿柱

乎黽馳之逕踉位其空聞人足音蹙然而喜矣又況乎
昆弟親戚之謦欬其側者乎久矣夫莫以真人之言謦
欬吾君之側乎 徐無鬼見武侯武侯曰先生居山林
食茅栗厭蔥薤以賓寡人久矣夫今老邪其欲干酒肉
之味耶其寡人亦有社稷之福邪徐無鬼曰無鬼生於
貧賤未嘗敢飲食君之酒肉將來勞君也君曰何哉奚
勞寡人曰勞君之神與形武侯曰何謂邪徐無鬼曰天
地之養也一登高不可以為長居下不可以為短君獨

為萬乘之主以苦一國之民以養耳目鼻口夫神者不自許也夫神者好和而惡姦夫姦病也故勞之唯君所病之何也武侯曰欲見先生久矣吾欲愛民而為義偃兵其可乎徐無鬼曰不可愛民害民之始也為義偃兵造兵之本也君自此為之則殆不成凡成美惡器也君雖為仁義幾且偽哉形固造形成固有伐變固外戰君亦必無盛鶴列於麗譙之間無徒驥於錙壇之宮無藏逆於得無以巧勝人無以謀勝人無以戰勝人夫殺人

之士民兼人之土地以養吾私與吾神者其戰不知孰善勝之惡乎在君若勿已矣修冑中之誠以應天地之情而勿撓夫民死已脫矣君將惡乎用夫偃兵哉

荀子魏武侯謀事而當羣臣莫能逮退朝而有喜色吳起進曰亦常有以楚莊王之語聞於左右者乎武侯曰楚莊王之語何如吳起對曰楚莊王謀事而當羣臣莫逮退朝而有憂色申公巫臣進問曰王朝而有憂色何也莊王曰不穀謀事而當羣臣莫能逮是以憂也其在

中歸之言也曰諸侯自為得師者王得友者霸得疑者在自為謀而莫已若者亡今以不穀之不肖而羣臣莫吾逮吾國幾於亡乎是以憂也楚莊王以憂而君以憊武侯後巡再拜曰天使夫子振寡人之過也○新序吳

作李
悝

子同呂覽

吳子武侯問曰願聞陳必定守必固戰必勝之道起對曰立見且可豈直聞乎君能使賢者居上不肖者處下則陳已定矣民安其田宅親其有司則守已固矣百姓

皆是吾君而非鄰國則戰已勝矣 武侯謂吳起曰今
秦脇吾西楚帶吾南趙衝吾北齊臨吾東燕絕吾後韓
據吾前六國之兵四守勢甚不便憂此奈何起對曰夫
安國家之道先戒為寶今君已戒禍其遠矣臣請論六
國之俗夫齊陳重而不堅秦陳散而自鬪楚陳整而不
久燕陳守而不走三晉陳治而不用夫齊性剛其國富
君臣驕奢而簡於細民其政寬而祿不均一陳兩心前
重後輕故重而不堅擊此之道必三分之獵其左右脇

而從之其陳可壞秦性强其地險其政嚴其賞罰信其人不讓皆有關心故散而自戰擊此之道必先示之以利而引去之士貪於得而離其將乘棄獵散設伏投機其將可取楚性弱其地廣其政騷其民疲故整而不久擊此之道襲亂其屯先奪其氣輕進速退弊而勞之勿與爭戰其軍可敗燕性慤其民慎好勇義寡詐謀故守而不走擊此之道觸而迫之陵而遠之馳而後之則上疑而下懼謹我車騎必避之路其將可虜三晉者中國

也其性和其政平其民疲於戰習於兵輕其將薄其祿士無死志故治而不用擊此之道阻陳而壓之衆來則拒之去則追之以倦其師此其勢也然則一軍之中必有虎賁之士力輕扛鼎足輕戎馬褰旗斬將必有能者若此之等選而別之愛而貴之是謂軍命其有工用五兵材力健疾志在吞敵者必加其爵列可以決勝厚其父母妻子勸賞畏罰此堅陳之士可與持久能審料此可以擊倍武侯曰善武侯問敵必可擊之道起對曰

用兵必須審敵虛實而趨其危敵人遠來新至行列未
定可擊既食未設備可擊奔走可擊勤勞可擊未得地
利可擊失時不從可擊涉長道後行未息可擊涉水半
渡可擊險道狹路可擊旌旗亂動可擊陳數移動可擊
將離士卒可擊心怖可擊凡若此者選銳衝之分兵繼
之急擊勿疑 武侯問曰用兵之道何先起對曰先明
四輕二重一信曰何謂也對曰使地輕馬馬輕車車輕
人人輕戰明知險易則地輕馬易秣以時則馬輕車膏

銅有餘則車輕人鋒銳甲堅則人輕戰進有重賞退有重刑行之以信審能達此勝之主也 吳子曰凡兵戰之場止尸之地必死則生幸生則死其善將者如坐漏船之中伏燒屋之下使智者不及謀勇者不及怒受敵可也故曰用兵之害猶豫最大三軍之災生於狐疑武侯問曰三軍進止豈有道乎起對曰無當天竈無當龍頭天竈者大谷之口龍頭者大山之端必左青龍右白虎前朱雀後玄武招搖在上從事於下將戰之時審

候風所從來風順致呼而從之風逆堅陳以待之武
侯問曰凡蓄奔騎豈有方乎起對曰夫馬必安其處所
適其水草節其飢飽冬則溫廄夏則涼廡刻剔毛鬣謹
落四下戢其耳目無令驚駭習其馳逐閑其進止人馬
相親然後可使車騎之具鞍勒銜轡必令完堅凡馬不
傷於末必傷於始不傷於飢必傷於飽日暮道遠必數
上下寧勞於人慎勿勞馬常令有餘備敵覆我能明此
者橫行天下吳子曰夫總文武者軍之將也兼剛柔

者兵之事也凡人論將常觀於勇勇之於將乃數分之一耳夫勇者必輕合輕合而不知利未可也故將之所慎者五一曰理二曰備三曰果四曰戒五曰約理者治衆如治寡備者出門如見敵果者臨敵不懷生戒者雖克如始戰約者法令省而不煩受命而不辭家敵破而後言返將之禮也故師出之日有死之榮無生之辱

吳子曰夫鼙鼓金鐸所以威耳旌旗旄幟所以威目禁令刑罰所以威心耳威於聲不可不清目威於色不可

不明心威於刑不可不嚴三者不立必敗於敵故曰將之所麾莫不從移將之所指莫不前死 吳子曰凡兵有四機一曰氣機二曰地機三曰事機四曰力機三軍之衆百萬之師張設輕重在於一人是謂氣機路狹道險名山大塞十夫所守千夫不過是謂地機善行間謀輕兵往來分散其衆使其君臣相怨上下相咎是謂事機車堅管轄舟利櫓楫士習戰陳馬閑馳逐是謂力機知此四者乃可為將然其威德仁勇必足以率下安衆

怖敵決疑施令而下不犯所在寇不敢敵得之國強去之國亡是謂良將 武侯問曰兩軍相望不知其將我欲相之其術如何起對曰令賤而勇者將輕銳以嘗之務於北無務於得觀敵之來一坐一起其政以理其追北佯為不及其見利佯為不知如此將者名為智將勿與戰矣若其衆謹譁旌旗煩亂其卒自行自止其兵或縱或橫其追北恐不及見利恐不得此為愚將雖衆可獲 武侯問曰嚴刑明賞足以勝乎起對曰嚴明之事

臣不能悉雖然非所恃也夫發號布令而人樂聞興師
動衆而人樂戰交兵接刃而人樂死此三者人主之所
恃也武侯曰致之奈何對曰君舉有功而進饗之無功
而勵之於是武侯設坐廟庭為三行饗士大夫上功坐
前行饋席兼重器上牢次功坐中行饋席器差減無功
坐後行饋席無重器饗畢而出又頒賜有功者父母妻
子於廟門外亦以功為差有死事之家歲遣使者勞賜
其父母著不忘於心行之三年秦人興師臨於西河魏

士聞之不待吏令介冑而奮擊之者以萬數武侯召吳起而謂曰子前日之教行矣起對曰臣聞人有短長氣有盛衰君試發無功者五萬人臣請率以當之脫其不勝取笑於諸侯失權於天下矣今使一死賊伏於壙野千人追之莫不梟視狼顧何者恐其暴起而害已也是以一人投命足懼千夫今臣以五萬之衆而為一死賊率以討之固難敵矣於是武侯從之兼車五百乘騎三千匹而破秦五十萬衆此勵士之功也先戰一日吳起

令三軍曰諸吏士當從受敵車騎與徒若車不得車騎
不得騎徒不得徒雖破軍皆無功故戰之日其令不煩
而威震天下

史記魏置相相田文吳起不說謂田文曰請與子論功
可乎田文曰可起曰將三軍使士卒樂死敵國不敢謀
子孰與起文曰不如子起曰治百官親萬民實府庫子
孰與起文曰不如子起曰守西河而秦兵不敢東鄉韓
趙賓從子孰與起文曰不如子起曰此子三者皆出吾

下而位加吾上何也文曰主少國疑大臣未附百姓不信方是之時屬之於子乎屬之於我乎起默然良久曰屬之子矣文曰此乃吾所以居子之上也吳起乃自知弗如田文

呂氏春秋吳起謂商文曰事君果有命矣夫商文曰何謂也吳起曰治四境之內成訓教變習俗使君臣有義父子有序子與我孰賢商文曰吾不若子曰今日置質為臣其主安重今日釋璽辭官其主安輕子與我孰賢

商文曰吾不若子曰士馬成列馬與人敵人在馬前援
桴一鼓使三軍之士樂死若生子與我孰賢商文曰吾
不若子吳起曰三者子皆不吾若也位則在吾上命也
夫事君商文曰善子問我我亦問子世變主少羣臣相
疑黔首不定屬之子乎屬之我乎吳起默然不對少選
曰與子商文曰是吾所以加於子之上已吳起見其所
以長而不見其所以短知其所以賢而不知其所以不
肖故勝於西河而困於王錯傾造大難身不得死焉

吳起治西河之外王錯譖之於魏武侯武侯使人召之
吳起至於岸門止車而休望西河泣數行而下其僕謂
之曰竊觀公之志視舍天下若舍屣今去西河而泣何
也吳起雪泣而應之曰子弗識也君誠知我而使我不
能秦必可亡而西河可以王今君聽讒人之議而不知
我西河之為秦也不久矣魏國從此削矣吳起果去魏
入荆而西河畢入秦魏日以削秦日益大此吳起之所
以先見而泣也

史記田文既死公叔為相尚魏公主而害吳起公叔之僕曰起易去也公叔曰奈何其僕曰吳起為人節廉而自喜名也君因先與武侯言曰夫吳起賢人也而侯之國小又與彊秦壤界臣竊恐起之無留心也武侯即曰奈何君因謂武侯曰試延以公主起有留心則必受之無留心則必辭矣以此卜之君因召吳起而與歸即令公主怒而輕君吳起見公主之賤君也則必辭於是吳起見公主之賤魏相果辭魏武侯武侯疑之而弗信也

吳起懼得罪遂去即之楚楚悼王素聞起賢至則相楚
明法審令捐不急之官廢公族疏遠者以撫養戰鬪之
士要在彊兵破馳說之言從橫者於是南平百越北并
陳蔡却三晉西伐秦諸侯患楚之彊故楚之貴戚盡欲
害吳起及悼王死宗室大臣作亂而攻吳起吳起走之
王尸而伏之擊起之徒因射刺吳起并中悼王悼王既
葬太子立乃使令尹盡誅射吳起而并中王尸者坐射
起而夷宗死者七十餘家

呂氏春秋鄢人之以兩版垣也吳起變之而見惡

淮南子吳起為楚令尹適魏問屈宜若曰王不知起之不肖而以為令尹先生試觀起之為人也屈子曰將奈何吳起曰將衰楚國之爵而平其制祿損其有餘而綏其不足砥礪甲兵時爭利於天下屈子曰宜若聞之昔善治國家者不變其故不易其常今子將衰楚國之爵而平其制祿損其有餘而綏其不足是變其故易其常也行之者不利宜若聞之曰怒者逆德也兵者凶器也爭者人之所本也今子陰謀逆德好用凶器始人之所


本逆之至也且子用魯兵不宜得志於齊而得志焉子
用魏兵不宜得志於秦而得志焉宜若聞之非禍人不
能成禍吾固惑吾王之數逆天道戾人理至今無禍差
須夫子也吳起惕然曰尚可更乎屈子曰成形之徒不
可更也子不若敦愛而篤行之老子曰挫其銳解其紛
和其光同其塵

韓非子昔者吳起教楚悼王以楚國之俗曰大臣太重
封君太衆若此則上偏主而下虐民此貪國弱兵之道

也不如使封君之子孫三世而收爵祿絕滅百吏之祿秩損不急之枝官以奉選練之士悼王行之期年而薨矣吳起枝解於楚

呂氏春秋吳起謂荆王曰荆所有餘者地也所不足者民也今君王以所不足益所有餘臣不得而為也於是令貴人往實廣虛之地皆甚苦之荆王死貴人皆來尸在堂上貴人相與射吳起吳起號呼曰吾示子吾用兵也拔矢而走伏尸揄矢而疾言曰羣臣亂王吳起死矣

且荆國之法麗兵於王尸者盡加重罪逮三族吳起之
智可謂捷矣



繹史卷一百五